

10/02/1998

Gawat jejas usaha labur luar negara

KUALA LUMPUR, Isnin - Datuk Seri Dr Mahathir Mohamad berkata, beliau `amat kesal' bahawa Malaysia terpaksa membatalkan rancangan melabur di Lebanon bagi membantu pembinaan semula negara itu kerana masalah ekonomi sendiri.

Menurut Perdana Menteri, ketika beliau melawat Lebanon pada Jun tahun lalu, ahli perniagaan yang mengiringinya amat berminat menyertai pembinaan semula Lebanon selepas perang saudara selama 15 tahun.

"Ahli perniagaan kami memikirkan mereka boleh menjalankan beberapa projek ditawarkan bagi membantu membangunkan semula Beirut dan beberapa tempat lain di Lebanon.

"Tetapi hari ini, kami amat kesal bahawa kami terpaksa menarik diri. Kami tidak mampu lagi untuk melabur di luar negara," katanya merujuk krisis mata wang serantau yang membawa kepada kegawatan ekonomi Malaysia sejak enam bulan lalu.

Beliau berucap pada jamuan makan malam meraikan Perdana Menteri Lebanon, Rafic Hariri, di kediaman rasminya, Sri Perdana di sini, malam ini.

"Malah, di negara kami sendiri keupayaan untuk melabur dan membangun sudah berkurangan. Secara tiba-tiba selepas bertahun-tahun menikmati kemakmuran hasil daripada sistem dan usaha kami sendiri, kami kini jatuh miskin bersama negara lain di Asia Tenggara," katanya.

Perdana Menteri juga menolak apa yang dikatakannya `sikap mementingkan diri dan hipokrasi' mereka yang memperjuangkan hak asasi manusia yang menuduh kerajaan-kerajaan Asia Tenggara mengamalkan rasuah, kronisme dan nepotisme serta tidak telus.

"Anda mungkin menyaksikan pada lawatan anda yang lalu bahawa kerajaan yang didakwa sebagai penindas, despotik dan korap di rantau ini sudah membina negara dan rakyat yang makmur," katanya.

Bagi Malaysia, Dr Mahathir berkata tidak ada pengangguran dan banyak kerja yang wujud sehinggakan pekerja dari negara lain datang beramai-ramai untuk berkongsi kemakmurannya.

"Jika kami mempraktikkan kronisme dan nepotisme, maka kita perlu anggap bahawa semua rakyat Malaysia adalah kroni-kroni dan anggota keluarga mereka semua mendapat manfaat daripada pentadbiran dan dasar kerajaan Malaysia dan juga dari kerajaan ekonomi harimau Asia Tenggara," katanya.

Beliau berkata, pemindahan modal dari rantau ini pada kemuncak krisis ekonomi yang bermula Julai tahun lalu sudah mengambil kekayaan yang dibina, menjadikan rantau ini hampir papa.

"Memang benar ada beberapa negara yang sudah dimufliskan oleh mereka, mengakibatkan berjuta-juta rakyat kehilangan pekerjaan, menyebabkan kekacauan sosial dan politik di mana pada satu masa kemakmuran dan kestabilan wujud.

"Semua ini kami diberitahu adalah kerja kuasa pasaran untuk mendisiplinkan kerajaan.

"Hari ini semua kemakmuran Asia Tenggara sudah lenyap, berjuta-juta pekerja menganggur dan beribu-ribu syarikat yang baik dimufliskan, pasaran saham merudum, bank dan syarikat kewangan terpaksa ditutup dan secara umumnya kemiskinan dan kesusahan sekali lagi melanda rakyat kami," katanya.

Beliau berkata tidak ada kerajaan di dunia ini yang sempurna dan semua kesalahan yang dilakukan di Asia Tenggara juga dilakukan di semua negara yang bercakap mengenai kerajaan dan pentadbiran yang baik.

Mengenai hubungan Malaysian-Lebanon, Dr Mahathir berkata kedua-dua

negara sedang dalam proses pembinaan semula.

"Negara anda dari kemusnahan peperangan dan kami dari kemusnahan yang disebabkan serangan yang tidak pernah berlaku sebelum ini ke atas ekonomi kami.

"Banyak persamaan di antara kita. Oleh itu, banyak yang dapat kita lakukan bersama. Malah, negara lemah yang bekerjasama di antara satu dengan lain dapat mempertingkatkan kekuatan mereka," katanya.

Sementara itu, Hariri berkata beliau percaya kepemimpinan negara ini akan dapat mengatasi masalah yang dihadapi kerana apa yang sedang alami sekarang hanyalah saat-saat kesukaran dan negara sudah melihat lebih dari itu sebelum ini.

(END)